

Ullormut oqaluuserisassanut nassuiaat.

(Inatsisartut Siulittaasoqarfiat)

Inatsisartut 2010-mi upernaakkut ataatsimiinneranni ullormut oqaluuserisassanut siunnersuutit siunnersuutillu oqaluuserisassanngortinneqartut siullermik ulloq 10. marts 2010-mi nassiunneqarput.

Tamatuma kingorna immikkoortut kinguartinneqarnissaannik oqaluuserisassallu ataasiakkaat ullut suliarineqarfissaasa nuunneqarnissaannik qinnuteqaatinik tigusaqartoqarpoq kiisalu oqaluuserisassat allaffissornikkut kukkusoqarsimanera pissutigalugu ullormut oqaluuserisassanut ilanngunneqartussaannigikkaluartut peerneqarlutik.

Siulittaasoqarfiup tamarmiusup isumaqatigiilluni oqaluuserisassat akuerineqarnissaat inassutigaa. Ilaasortat partiillu ataasiakkaat oqaluuserisassat nassiunneqarneranni qinnuigineqarsimapput uparuatissaqassagalarunik taakku nassuteqqullugit. Partii ataasiinnaq, tassa Siumut, tamanna tunngavigalugu kissaateqarsimavoq siunnersuutimik pingasut oqaluuserisassanut ilanngunneqarnissaannik, siulittaasoqarfiup inassuteqaatai isumaqatiginagit.

Siulittaasoqarfiup isumaqatigiittup ulloq 8. april ataatsimiinnermini siunnersuutit UKA2010-mi saqqummiunneqannginnerminni sukumiinerusumik misissorneqarnissaannik inassuteqaatini aalajangiusimavaa. Ilaasortat partiillu siunnersuutaat itigartinneqartussat inassutigineqarsimasut Inatsisartut Allattoqarfianni sulisutsinnik ikiortissarsiorsinnaapput, siunnersuutit ukiakkut ataatsimiinnermi oqaluuserisassanut ilanngunneqarsinnaasunngorlugit ilusilerneqarnissaat qularnaarniarlugu.

Siunertaanngilaq matumani siulittaasoqarfiup iliusaasa inassuteqaataasalu oqallisigineqarnissaat. Taamaattumik siunnersuutigaara siunnersuutit pingasut oqaluuserisassanut ilanngunneqassanersut isumaqatigiinngissutaasut ingerlaannartumik taasissutigissagivut.

Tamatumani pineqarput immikkoortoq 152:

Kalaallit Danmarkimi ilinniagaqartut nunatsinniit ilinniagaqarnersiuteqartinneqartut danskisuulli ilinniagaqarnersiutillit inissisimatinneqarnissaat anguniarlugu Naalakkersuisut suliniutinik aallartitseqqullugit peqquneqarnissaannik Inatsisartut aalajangiiffigisassaattut siunnersuut.

Aamma,

Immikkoortoq 54:

Kalaallit Nunaanni inuussutissanut tunngasut aammalu nersutit nakorsaasa nakkutilliinerannut tunngasut naalagaaffimmiit tiguneqarnissaat pillugu, inatsisartut 2010-imi ukiakkut ataatsimiinneranni Naalakkersuisut siunnersuuteqaqqullugit peqquneqarnissaannik Inatsisartut

aalajangiiffigisassaattut siunnersuut.

Kiisalu,

Immikkoortoq 142: Qinigaanerup misilinneqarnissaanut ataatsimiititaliap politikeriunngitsunik inuttaqalernissaa anguniarlugu Inatsisartut Naalakkersuisullu pillugit Inatsisartut inatsisaata nr. 11 20. oktober 1988-imeersup allannguutissaanik Naalakkersuisut suliaqaqqullugit peqquneqarnissaanik Inatsisartut aalajangiiffigisassaattut siunnersuut.

Akerliusoqanngippat siunnersuutigissavara ataatsikkut taasissutigissagivut.

Maannakkullu taasissutigineqassaaq immikkoortoq 152-ip, immikkoortoq 54-ip immikkoortullu 142-ip oqaluuserisassanut ilanngunneqarnissaanik Siumup siunnersuutaa.

Inatsisartunut ilaasortat qinnuigissavakka taaseqqullugit. [... OQAASEQANNGILAAARNEQ...] Taasineq maanna naammassivoq.

- [QASSIT] siunnersuummut isumaqataallutik taasipput.
- [QASSIT] siunnersuummut akerliullutik taasipput.
- [QASSIT] taaseqataanngillat.

Taamaalilluni siunnersuut **akuerineqarpoq / itigartinneqarpoq.**

Kiisalu suleriaatsitsinni oqaaseqarnissamut piffissaliussat allanngortinneqarnissaanik siunnersuut tusarniaassutigereerlugu siulittaasoqarfiup isumaqatigiittup ullormut oqaluuserisassanut ilanngussassaaq ippassaaq nassiuppaa, tassalu ullormut oqaluuserisassani immikkoortoq 31, Kalaallit Nunaanni Inatsisartut Suleriaasiata allanngortinneqarnissaanik siunnersuut (Oqaaseqarnissamut piffissaliussat allanngortinneqarnerat).

Siunnersuut suleriaatsimi aalajangersakkat naapertorlugit immikkut akuersissuteqarnikkut suliarineqassaaq, taamaalillunilu suleriaatsimut allannguutit akuersissutigineqarnerisa kinguninngua aalajangersakkat nutaat atuutilernissaat siunertaralugu immikkoortoq ullumi ataatsimiinnermi siullermeerneqassaaq, aappassaaneerneqassaaq pingajussaaneerneqassallunilu.

Oqaluuserisassanut nassiunneqaqqaartunut sanilliullugu oqaluuserisassani allannguutit oqaluuserisassani ullumi agguanneqarlutillu nassiunneqartuni takuneqarsinnaapput.

Immikkoortoq 23-p appassaaneerneqarnissaata atugarissaarnermut akileraarternemullu isumalioqatigiissitap suliaata naammassineqarnissaata tungaanut kinguartinneqarnissaa Ilaqutariinnermut Ataatsimiititaliami amerlanerussuteqartut qinnutigaat. Taamaalilluni immikkoortoq oqaluuserisassanit peerneqarpoq.

Immikkoortoq 30 Naalakkersuisunit tunuartinneqarpoq. Taamaalilluni siunnersuut

oqaluuserisassanit peerneqarpoq.

Siunnersuutit ilaat 2009-mi ukiakkut ataatsimiinnermi siullermeerneqarput aammalu 2010-mi upernaakkut ataatsimiinnermi suliarineqaqqittussangorlugit innersuunneqarlutik.

Inatsisartuni oqallinnerup nangeqqinneqarnissaanut immikkut tunngavissaqanngippat siunnersuutit taakku toqqaannartumik taasisutigineqassasut Siulittaasoqarfiup inassutigaa. Suliarinninnerup nanginnerani siunnersuutip pineqartup inersuarmi isumaqatigiinniutigeqqinnissaa kissaatigineqarpat Naalakkersuisut aamma/imaluunniit Inatsisartunut ilaasortat qinnuigineqarput siunnersuutip pineqartup suliarineqarnissaa sioqqullugu Siulittaasoqarfimmut saaffiginequneqarput.

Ulluni ataatsimiiffiusuni ataasiakkaani immikkoortut angumerineqanngitsoortut ullormi ataatsimiiffiusumi tullermi oqaluuserineqartassapput.

Inatsisartunut ilaasortat partiilluunniit oqaluuserisassanut oqaaseqaatissaqarunik kissaateqarunilluunniit ataatsimiinnerup aallartinnissaa kingusinnerpaamik sapaatip akunneranik ataatsimik sioqqullugu Siulittaasoqarfimmut saaffiginequllugit qinnuigineqarsimapput. Taamaattoqarsimanngilaq.

Kiisalu oqaatigineqassaaq ilaasortat siunnersuutaasa saqqummiunneqartut kalaallisut danskisullu eqqortumik oqaasertalersornissaat Inatsisartunut ilaasortat ataasiakkaat namminneq akisussaaffigimmassuk. Oqaatsinik erseqqissaanissaq kissaatigineqarpat siunnersuutip 2010-mi upernaakkut ataatsimiinnermi oqaluuserineqarnissaa sioqqullugu naqqiummik Allattoqarfimmut nassiussisoqarnissaa qinnutigineqarpoq.

Uparuaatissaqartoqanngippat oqaluuserisassat akuersissutigineqartutut isigineqarput.